



partii naleraq

Nuuk 12. oktober 2018
UKA2018/207
Hans Enoksen Partii Naleraq

Inatsisartut aalajangiiffigisassaattut siunnersuut, Namminersorlutik Oqartussat ilalissagaat NemID-mik pisortat digitaliusumik signaturiannik imaqartumik inunnut aamma inatsisit naapertorlugit immikkoortortani sulisunut Kalaallit Nunaanni atortuulersinneqassasoq
Kunngip peqqussutaagut

(Ilinniartitaanermut, Kultureqarnermut, Ilageeqarnermut Nunanullu Allanut Naalakkersuisoq)

Nem ID atuinerup aalajangiiffigisassatut siunnersuut Kunngip peqqussutaatigut nunatsinnut atuutilersinneqarnissaa Naalakkersuisut saqqummiussa at qaseqarfigissavarput.

Nunarsuarmi sumiikkaluaraanniluunnit pisortanik sullinneqarneq annertoorejussuarmik qarasaasiarsornikkut ingerlanneqalernikuvoq, ukiunilu kingullerni aamma nunatsinni teknikkikkut periarfissat pitsanngoriartorerini malunnartumik pisortat sullissineranni aammalu pisortanut aningaaserivinnullu inuit imminnut sullinneranni atussallugu pinngitsoorneqarsinnaajunnariartuinnarluni.

Soorunami Nem ID peqassagaanni aamma paasissutissat inunnut tunngasut inatsimmik sinaakkutaqartumik isumannaallisagaassaapput inuit pineqartut isumannaatsumik illersorneqarnissaat anguniarlugu. Kiisalu aamma suliffeqarfiit innuttaasullu inatsisitigut illersugaanissaat pillugit siunnersuut isumaqatigalugu oqaatigissavarput.

Pissutsillu atuutilertussat pillugit isummersuutinik saqqunmiussaqaalaarniarput tassami tamatta digitalinut tunngasumik ilisimatuujunngitsugut amerlagunaratta.

Siunissami taamatut kiffartuussisarnissaq nunatsinni atulissappat taava kiffartuussinikkut periarfissat annertuumik qaammarsaatigineqarnissaat sullissinikkullu pikkorissaanissat sillimaffigilluarneqassasut kaammatuutigaarput.

Nunarput isorartoorujussuovoq pinngortitamilu peqqarniissinnaasumik inuuvugut ilaatigut teknikkikkut ajutoornikkut ullorpassuit periarfissaqarsinnaasarata. Tamakkununga tunngasut qanoq sillimaffiginiarneqassanersut ilanngullugu eqqarsaatigineqassasut kissaatigaarput.

Nunatsinni tamatta qarasaasiaqanngilagut, aamma pappiaqqatigut uppernarsaatissat allallu siunissami aamma pisariaqartinneqartuartaassaapput, tamakkununga qanoq sillimmartaarniarput? Aammalu qanoq pisortanik ulluinnarni ajornartorsiutit tamakkua annikinnerussappata qularnanngitsumik illoqarfinni nunaqarfinnilu nutaamik aaqqissuusinnissat ajornartorsiutaasinnaasunik naammattoorsiuffiusinnaanissaat ilimanarlunnarmat.

Utoqqaat eqqarsaatigalugit immikkut ikiorsiisarnissat pinngitsoorneqarsinnaanaviangillat suut tamarmik digital-imik ingerlassasut aaqqissuussisoqassappat inunnut amerlasuunut ajornartorsiutinik pilersitsissapput. Aammalu ilaatigut inuit allassimasunik atuarsinnaanngitsut innarluutillit pitsaasumik ikiorneqarsinnaanerat isumannaatsumik aaqqiiniarnermi eqqarsaatigilluarneqassasut kissaatigaarput. Tassami ilimananngimmat aamma kalaallit oqaasii kisiisa atorlugit sullissinerit ingerlanneqassasut. Taamaattumik pisortat ikiuulluarnissaat saneqquneqarsinnaanngitsoq sillimmartaarfigeqqussavarput.

Aammalu Nem ID-imik atuisut arlaatigut kukkuluttornikkut imaluunniit Nem ID-mik atuinerikkut arlaatigut kukkuluttoortoqarpat naammagittaalliorfigisinnaasaasa qaammarsaatigilluarneqarnissaat ilanngullugu ersarissumik innuttaasunut qaammarsaassutigineqarnissaa kissaatigaarput.

Taamatut oqaseqarluta Ilinniartitaanermut ataatsimiititaliami suliarineqarnissaa innersuussutigaarput.